

Petersen Dyggve

I.

Lanque fine fueille et flor,
que voi la froidure entrer,
lors chant a guise de plour,
c'autrement ne puis chanter.
Maiz a la gent vueill moustrer
se ma dame a grant honour
de son bon ami grever.

II.

Mes cuers me fait grant irour
qui ne m'en leisse tourner,
ançois double chascun jour
son voloir de moi lasser.
Quant loisir ai d'esguarder,
seigneur, se je faiz folour,
mout par m'en devroit peser.

III.

Se je l'aim de fine amour,
je n'en faiz mie a blasmer,
qu'en li a tant de valour
c'on ne la puet trop amer;
maiz pour Dieu li vueill mander
que tant m'ost de ma dolour
que l'autre puisse porter.

IV.

S'onques hom merci trova,
je n'i doi mie faillir;
c'onques més riens tant n'ama
com je faiz en lonc consir.
Si ne m'en doi repentir;
que cil qui tant servi a
ne doit perdre pour soufrir.

V.

Ja nului tort ne fera
s'ele me leisse morir;
que sienz sui, si m'ocirra
quant li vendra a pleisir;
n'Amours n'en doit pas mentir:

puiz que a li me dona,
bien me doi en ce tenir.

VI.

Se Dieu plaist, bien me vendra
de loial amour servir;
c'onques nus n'en empira
se ele li voulta merir.
Ja Diex ne me laist mentir,
maiz a son plaisir sera
que qu'il m'en doive avenir.

VII.

Gui de Ponciauz, au fenir,
ne vous oublierai ja.
pour vous doi la mort haïr.

- letto 591 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropaea.let.uniroma1.it/?q=laboratorio/petersen-dyggve-43>